



**State Mufti's Office**  
*Prime Minister's Office*  
**Brunei Darussalam**

## **SEMBAHYANG JUMAAT: JANGAN PAKAI PAKAIAN ASAL PAKAI!**

**(Bilangan 267 Bahagian Akhir)**

*(Dengan nama Allah, Segala puji bagi Allah, Selawat dan salam ke atas  
Rasulullah Shallallahu 'alaihi wasallam, keluarga, sahabat dan para pengikut Baginda)*

### **Adakah Mesti Pakaian itu Baru?**

Sesetengah ulama mengatakan sunat memakai pakaian putih yang baru. Namun jika tiada pakaian putih yang baru, maka memadai pakaian putih yang masih dianggap baru. Ini kerana apa yang dimaksudkan daripada pakaian yang terbaik, bagus dan elok itu bukanlah semestinya pakaian yang baru setiap minggu sehingga menyebabkan kesusahan kepada individu tersebut. Apa yang dimaksudkan ialah umpamanya dia mempunyai beberapa helai pakaian putih, maka sunat dia memilih pakaian putih yang baru di antara kesemuanya.

Namun jika dia ada kemampuan untuk menyediakan pakaian yang khusus untuk digunakan pada hari Jumaat sahaja, maka lakukanlah. Ini kerana Rasulullah *Shallallahu 'alaihi wasallam* pernah menyarankan perkara ini dalam hadits yang diriwayatkan oleh Muhammad bin Yahya:

( )

**Maksudnya:** “*Tidak ada salahnya jika salah seorang daripada kamu, atau kamu sekaliannya, (jika ada kemampuan) untuk menyediakan dua pakaian (khusus untuk dipakai) pada hari Jumaat, (iaitu sebagai tambahan) selain dari dua pakaian kerjanya yang sehari-hari.*”

(Hadits riwayat Abu Daud)

### **Pakaian Bagi Imam**

Begitu juga halnya bagi imam, di mana dia juga disunatkan untuk memakai pakaian yang terbaik. Bahkan disunatkan dan digalakkan untuk menjaga penampilannya, iaitu dengan menambah perhiasan pakaian yang lain seperti serban dan memakai jubah (tambahan pada bahagian luar) kerana *ittiba‘* (mencontohi perbuatan Nabi *Shallallahu ‘alaihi wasallam*). Ini kerana imam itu menjadi perhatian dan sebagai contoh ikutan kepada para jemaah.

Adapun warna pakaian bagi imam pula, *ash-shahih* menurut Imam an-Nawawi *Rahimahullah* ialah sunat memakai pakaian putih, iaitu seperti mana jemaah yang lainnya. Menurut pendapat beberapa ulama, meninggalkan memakai pakaian hitam itu adalah lebih utama (*awla*) daripada memakainya. Melainkan andaikata jika dia tidak memakai pakaian hitam, maka dia takut ataupun kuat sangkaannya akan mendatangkan akibat buruk kerana dia telah menyalahi (perintah) sultan atau selainnya.

Manakala Imam al-Ghazali *Rahimahullah* menyebut dalam kitabnya *Ihya 'Ulumuddin* hukumnya adalah makruh bagi khatib (atau imam) memakai pakaian hitam. Diertikan juga makruh itu dengan menyalahi yang utama. Begitu juga bagi para jemaah, hukumnya adalah makruh memakai pakaian hitam.

### **Periwayatan Pakaian Hitam**

Adapun pendapat al-Mawardi *Rahimahullah* yang melazimkan pakaian hitam pada hari Jumaat adalah kerana satu kemungkinan atau sebab, iaitu pada zaman tersebut para pemerintah Abbasiyah (*'Abbasiiyin*) menegah pembaca-pembaca khutbah untuk memakai pakaian selain warna hitam.

Di samping itu terdapat juga beberapa riwayat yang dibawakan berkaitan dengan perkara ini, antaranya:

1. Nabi *Shallallahu 'alaihi wasallam* memasuki Makkah pada hari pembukaaan Makkah dengan memakai serban hitam.
2. Nabi *Shallallahu 'alaihi wasallam* memasuki Makkah pada hari pembukaaan Makkah lalu berkhotbah kepada orang ramai dengan memakai serban hitam.
3. Baginda *Shallallahu 'alaihi wasallam* memakai serban hitam pada Hari Raya Adhha dan Fitrah.
4. Daripada at-Thabarani menyatakan bahawa Nabi *Shallallahu 'alaihi wasallam* memakaikan Sayyidina *'Ali Karramallahu wajhah* serban hitam, kemudian Baginda mengutus Sayyidina *Ali Karramallahu wajhah* ke (peperangan) Khaibar.
5. Telah *dinaqalkan* (diceritakan) bahawa ramai daripada para sahabat dan para *tabi'in* memakai pakaian hitam.

Ibnu Hajar al-Haitami *Rahimahullah* dalam kitab *Tuhfah al-Muhtaj* mengatakan bahawa memang benar apa yang dibawakan dalam hadits yang telah disebutkan di atas. Namun beliau juga menyatakan satu kesimpulan sebagai menjawab persoalan ini bahawa kesemua hadits di atas adalah periwayatan dari segi perbuatan berdasarkan satu-satu keadaan atau kejadian yang tertentu. Sedangkan hadits yang menyuruh memakai pakaian berwarna putih adalah periwayatan dari segi pengucapan (suruhan).

Maka menurut Ibnu Hajar *Rahimahullah*, apabila terdapat perbezaan antara dua hadits, iaitu hadits percakapan dan hadits perbuatan Baginda, maka didahulukan atau diutamakan hadits percakapan atau suruhan Nabi *Shallallahu 'alaihi wasallam*.

Adapun yang dimaksudkan bahawa Nabi *Shallallahu 'alaihi wasallam* memakai serban hitam itu pada 'satu-satu keadaan atau kejadian yang tertentu' ialah pemakaian hitam bukan pada hari Jumaat umpamanya:

- 1) Pada waktu peperangan, iaitu untuk menakutkan musuh kerana warna hitam itu lebih menggerunkan.
- 2) Pada hari pembukaan Makkah, iaitu sebagai satu isyarat atau pemberitahuan bahawa agama yang dibawa oleh Nabi *Shallallahu 'alaihi wasallam* itu tidak akan berubah-ubah seperti juga warna hitam. Berbeza dengan warna-warna yang lain yang boleh berubah-ubah.
- 3) Pada dua Hari Raya kerana sunat memakai pakaian yang terbaik dan cantik. Ini kerana pada hari raya jika ada pakaian yang lebih cantik, bagus atau mahal harganya, maka pakaian

itu adalah afdhal dan diutamakan untuk dipakai daripada yang berwarna putih.

Sebagai kesimpulan, hukum memakai pakaian yang terbaik pada hari Jumaat adalah sunat. Manakala warna yang afdhal dan diutamakan ialah yang berwarna putih. Bahkan disunatkan juga supaya kesemua jenis pakaian yang dipakai itu berwarna putih termasuk serban atau alas kepala. Sekiranya dia tidak memperolehi kesemuanya berwarna putih, maka memadaiilah memakai warna putih itu pada pakaian di bahagian atas. Kemudian jika tiada juga, maka memadaiilah memakai pakaian selain putih, iaitu yang berwarna.

Menurut Imam al-Ghazali *Rahimahullah* pakaian berwarna putih merupakan warna yang paling disukai oleh Allah *Subhanahu wa Ta'ala*. Maka tidak hairanlah sesetengah ulama menggalakkan pakaian serba putih itu dipakai pada apa saja bentuk perkumpulan sekalipun bukan pada hari Jumaat.

Sesetengah ulama mengatakan hukum memakai pakaian hitam; samada bagi imam atau para jemaah, pada hari Jumaat adalah makruh dan meninggalkannya adalah lebih utama. Seperti yang diketahui bahawa melakukan perkara yang makruh itu tidak berdosa akan tetapi meninggalkannya pula akan diberikan ganjaran pahala. Maka di samping melakukan ibadah fardhu pada hari Jumaat, wajarlah juga direbut peluang untuk meraih ganjaran pahala kerana melakukan perkara yang disunatkan serta meninggalkan perkara yang makruh.